

Uunga siunnersuut: Inuussutissarsiutinik ingerlatsisutut aningaasaateqarfiit pillugit inatsisip atuutsilernissaa pillugu Kalaallit Nunaannut peqqussummut oqaaseqaatissamut Inatsisartut aalajangiiffigisassaattut siunnersuut
(Inuussutissarsiornermut, Suliffeqarnermut, Niuernermut Nunanullu Allanut Naalakkersuisoq)

Saqqummiussissut
(Inuussutissarsiornermut, Suliffeqarnermut, Niuernermut Nunanullu Allanut Naalakkersuisoq)

Siullermeerneqarnera

Aalajangiiffigisassatut siunnersuut danskitkalaallillu suleqatigiissitaliaannit, Kalaallit Nunaanni inuussutissarsiornermik ineriartortitsinermik aamma niuernermik tunngaveqartumik aningaasaliisarnernik siuariartortitsinissamut siunnersuuteqartussatut, 2013-imi pilersinneqartumit inassuteqaatinik malitseqartitsineruvoq.

Suleqatigiissitap nalunaarusiaani ilaatigut inuussutissarsiornermut inatsisinik, suliassaqarfinni pingaarutilinni arlalinni suli Danmarkimit aalajangiisinnaatitaaffigineqartunik aammalu annertuumik EU-imi inatsisinik aallaaveqartunik, ingerlaavartumik nutarterisarnissamik pisariaqartitsineq tikkuarneqarpoq. Inuussutissarsiornerup, ingerlatseqatigiiffinnut naatsorsuutinullu suliassaqarfiit iluanni naalagaaffeqatigiinneq akimorlugu maleruagassat assigiippata, suliffeqarfinnut qallunaanit, nunanit allamiunit kalaallinillu pigineqartunut tamanna allaffissornikkut pisariinnerulersitsisinnaavoq. Kalaallit Nunaata aningaasaliisussanik suliffeqarfinnillu pilirilersitsiniartarnera eqqarsaatigalugu suleqatigiissitaliaq isumaqarpoq Kalaallit Nunaanni inuussutissarsiornermut inatsisit ullutsinnut naleqquttuunissaat paasiuminartuunissaallu pingaaruteqartorujussuusoq.

Inuussutissarsiutinik ingerlatsisutut aningaasaateqarfiit pillugit inatsisip atuutilersinnissaa, inuussutissarsiornermut inatsisinik nutarterinermi inatsisinik arlalinnik, aamma aktiaatileqatigiiffinnut pigineqatigiillunilu ingerlatseqatigiiffinnut inatsit (ingerlatseqatigiiffinnut inatsit), ukiumoortumik naatsorsuusiortarnermut inatsit, naatsorsuutinut allattuisarnermut inatsit aamma naalagaaffimmit akuerineqartumik uppernarsaasiisarneq aamma kukkuneruisartut nalunaarsorsimasut pillugit inatsit pillugit inatsisinik atuutsilernissamik ilaqartut, ataatsimoortunngorlugit suliaqarnissap ilagiinnarpaa ataaseq.

Peqqussummut siunnersuummi taamaalilluni siunertaavoq, inatsit nr. 712, 25. juni 2014-imeersoq kunngip peqqussutaatigut Kalaallit Nunaanni pissutsit malillugit allannguuteqartillugu Kalaallit Nunaannut atuutsinneqartoq naapertorlugu inuussutissarsiutinik ingerlatsisutut aningaasaateqarfiit pillugit inatsisip nutaap atuutilersinneqarnissaa. Inuussutissarsiutinik ingerlatsisutut aningaasaateqarfiit pillugit inatsit nutaaq aamma ukiumoortumik naatsorsuusiortarnermut inatsimmut aamma inuussutissarsiornermi naammagittaalliortarfik pillugu inatsimmut aalajangersimasunik allannguuteqartitsinermik imaqarpoq. Ukiumoortumik naatsorsuusiortarnermut inatsisip Kalaallit Nunaannut atuutilersinnissaa pillugu peqqussutip nutarterneqarneranut siunnersuut ilaatigut inuussutissarsiutinik ingerlatsisutut aningaasaateqarfiit pillugit inatsit nutaaq malillugu allannguutinik imaqassaaq.

Inuussutissarsiutinik ingerlatsisutut aningaasaateqarfiit pillugit inatsimmut nutaamut siunertaavoq inuussutissarsiutinik ingerlatsisutut aningaasaateqarfinnut maleruagassiinermut taamaaqataanik iluarsaaqqinnissaaq, taamaalilluni aningaasaateqarfiup ilusaanut atuuttut immikkut ilisarnaataasut isiginiarneqarlutik, Danmarkimi suliffeqarfiit ilusaannut assigiinngitsunut maleruagassat assigiit atuutissallutik. Tamanna pingaartumik tassaassaaq aningaasaateqarfiit imminut pigisuusut, aammalu tamatumunnga illuatungiliullugu aningaasaateqarfinnut oqartussaasoq aningaasaateqarfinnut nakkutilliisuussalluni.

Inuussutissarsiutinik ingerlatsisutut aningaasaateqarfiit pillugit inatsit siusinnerusukkut atuuttoq, ingerlatseqatigiiffinnut inatsimmi siusinnerusukkut atuuttumi immikkoortunik arlalinnik tunngaveqarpoq. Ingerlatseqatigiiffinnut maleruagassiinermik iluarsaaqqinneq ingerlanneqartoq, taamaattumik inuussutissarsiutinik ingerlatsisutut aningaasaateqarfinnut maleruagassanut tunngatillugu ingerlatseqatigiiffinnut iluarsaaqqinneq qanoq pingaaruteqarnerisooq erseqqinnerusumik qimerloorneqarnissaanik pissusissamisoortumik pisariaqartitsinermik malitseqarpoq. Peqatigisaanik ukiuni kingulliunerusuni ineriartornerup kingunerisaanik akisussaasuuneq, ammasuuneq aamma pitsaasumik suliffeqarfinni pisortanilu ineriartortitsineq sammineqarnerulerput. Tassunga ilanngutissaaq ukiuni kingulliunerusuni ersarissuutitsinissamut aamma inuussutissarsiutinik ingerlatsisutut aningaasaateqarfiit nakkutilliivigineqarnerannut tunngatillugu apeqqutit qaqinneqartarsimanerat, aqutsinermut, taassuma katitigaaneranut attuumassuteqannginneranullu killissaliussat ilanngullugit.

Taamatut oqaaseqarlunga siunnersuut Inatsisartuni suliarineqarnissaa inassutigaa.